

- („Službeni glasnik BiH“, broj 103/12 od 25.12.2012. godine)

Na osnovu člana 18. stav (4) Zakona o graničnoj kontroli ("Službeni glasnik BiH", br. 53/09 i 54/10) i člana 61. stav (2) Zakona o upravi ("Službeni glasnik BiH", br. 32/02 i 102/09), ministar komunikacija i prometa Bosne i Hercegovine donosi

**PRAVILNIK**  
**O OBLIKU I SADRŽAJU OZNAKA I DRUGE SAOBRAĆAJNE SIGNALIZACIJE KOJIM SE OZNAČAVA GRANIČNI PRIJELAZ I NJEGOVO PODRUČJE, BLIZINA GRANIČNE LINIJE, KAO I O NAČINU POSTAVLJANJA TIH OZNAKA I SIGNALIZACIJE**

**Član 1.**

**(Predmet Pravilnika)**

Ovim Pravilnikom propisuje se oblik, sadržaj i način postavljanja oznaka i druge saobraćajne signalizacije na graničnom prijelazu, području graničnog prijelaza i uz liniju državne granice.

**POGLAVLJE I. OZNAČAVANJE GRANIČNOG PRIJELAZA I PODRUČJA GRANIČNOG PRIJELAZA**

**Član 2.**

**(Označavanje graničnog prijelaza)**

(1) Na graničnom prijelazu za međunarodni saobraćaj i graničnom prijelazu za pogranični saobraćaj na ulazu u Bosnu i Hercegovinu postavlja se oznaka obavještenja na tabli bijele boje, veličine 1600 x 900 mm. U gornjem središnjem dijelu table je grb Bosne i Hercegovine visine 300 mm i srazmjerne širine, a ispod grba, u donjem središnjem dijelu table je natpis "Bosna i Hercegovina", ispisan slovima veličine 140 mm crne boje. Širina plavo - žute ivice table je 30 mm, od kojih je plava krajnja traka (Prilog 1. ovog Pravilnika).

(2) Oznaka iz stava 1. ovog člana na prijelazu za cestovni saobraćaj postavlja se na vidno mjesto s desne strane, na graničnoj liniji, odnosno u njenoj neposrednoj blizini na pogodnom mjestu.

(3) Oznaka iz stava 1. ovog člana na graničnom prijelazu za zračni, pomorski, riječni i željeznički saobraćaj, postavlja se pred ulazom na područje graničnog prijelaza, na način da bude vidljiv svima koji ulaze u Bosnu i Hercegovinu.

**Član 3.**

**(Označavanje područja graničnog prijelaza)**

(1) Područje graničnog prijelaza za međunarodni saobraćaj označava se oznakom obavještenja na tabli bijele boje, veličine 1250 x 1350 mm. U gornjem središnjem dijelu oznake obavještenja je grb Bosne i Hercegovine srazmjerne visine 250 mm i srazmjerne širine, ispod kojeg je natpis "PODRUČJE GRANIČNOG PRIJELAZA ZA MEĐUNARODNI SAOBRAĆAJ", ispisan slovima veličine 70 mm crne boje. U središnjem dijelu oznake obavještenja je naziv graničnog prijelaza, ispisan slovima veličine 70 mm crne boje. Ispod naziva graničnog prijelaza je natpis "KRETANJE OGRANIČENO", ispisan slovima veličine 70 mm crne boje (Prilog 2. ovog Pravilnika).

(2) Područje graničnog prijelaza za pogranični saobraćaj označava se oznakom obavještenja na tabli bijele boje veličine 1250 x 1350 mm, sa plavo-žutom ivicom širine 30 mm, od kojih je plava krajnja traka. U gornjem središnjem dijelu oznake obavještenja je grb Bosne i Hercegovine visine 250 mm i srazmjerne širine ispod kojeg je natpis "PODRUČJE GRANIČNOG PRIJELAZA ZA POGRANIČNI SAOBRAĆAJ" ispisan slovima veličine 70 mm crne boje. U središnjem dijelu oznake obavještenja je naziv graničnog prijelaza ispisan slovima veličine 70 mm crne boje. Ispod naziva graničnog prijelaza je natpis "KRETANJE OGRANIČENO", ispisan slovima veličine 70 mm crne boje (Prilog 3. ovog Pravilnika).

(3) Ispod oznake obavještenja iz st. (1) i (2) ovog člana postavlja se dopunska tabla bijele boje veličine 1250 x 520 mm, sa plavo-žutom ivicom širine 30 mm, od kojih je plava krajnja traka, na kojem je

natpis "OTVORENO" ispisano slovima veličine 70 mm crne boje, ispod kojeg je crnom bojom upisano vrijeme rada graničnog prijelaza (npr. 0 - 24h ili 6 - 22h) (Prilozi 4. i 5. ovog Pravilnika).

#### **Član 4.**

##### **(Postavljanje oznaka)**

(1) Na graničnom prijelazu u cestovnom saobraćaju oznaka obavještenja iz člana 2. i 3. ovog Pravilnika postavlja se na ulaznoj i izlaznoj strani područja graničnog prijelaza, u skladu sa Pravilnikom o saobraćajnim znakovima i signalizaciji na cestama, načinu obilježavanja radova i prepreka na cesti i znakovima koje učesnicima u saobraćaju daje ovlašteno lice ("Službeni glasnik BiH", broj 16/07).

(2) Na graničnom prijelazu za željeznički saobraćaj, oznaka obavještenja iz člana 2. i 3. ovog Pravilnika postavlja se na ulazu ispred željezničke stanice, na željezničkom peronu ili na dijelu pruge pred ulazom na područje graničnog prijelaza.

(3) Na graničnom prijelazu za zračni saobraćaj oznaka obavještenja iz člana 2. i 3. ovog Pravilnika postavlja se na zgradi aerodroma iz pravca platforme.

(4) Na graničnom prijelazu za riječni i pomorski saobraćaj oznaka obavještenja iz člana 2. i 3. ovog Pravilnika postavlja se na ulazu u obilježeni dio luke ili pristaništa, kao i na obali predviđenoj za pristajanje plovila u blizini ulaza u luku ili pristanište, okrenut prema rijeci odnosno moru.

#### **Član 5.**

##### **(Označavanje na zajedničkom graničnom prijelazu)**

Na zajedničkom graničnom prijelazu, u slučaju eksteritorijalnog obavljanja granične kontrole na području jedne ili druge države, oblik, sadržaj i način postavljanja propisanih oznaka i signalizacije uređuje se međunarodnim ugovorom.

#### **Član 6.**

##### **(Signalizacija na graničnom prijelazu)**

Na graničnom prijelazu za cestovni saobraćaj, radi omogućavanja lakše granične kontrole saobraćaja, označavaju se saobraćajne trake ucrtavanjem simbola i natpisa koji usmjeravaju vozila i lica na određene kontrolne kućice, na način propisan Pravilnikom o saobraćajnim znakovima i signalizaciji na cestama, načinu obilježavanja radova i prepreka na cesti i znakovima koje učesnicima u saobraćaju daje ovlašteno lice.

#### **Član 7.**

##### **(Druge oznake na graničnom prijelazu)**

Osim oznaka propisanih čl. 2. i 3. ovog Pravilnika nadležni organ postavlja i druge oznake koje obavještavaju putnike o kretanju i postupanju na području graničnog prijelaza ili druge propisane znakove i signalizaciju.

#### **Član 8.**

##### **(Jarbol za zastavu Bosne i Hercegovine)**

(1) Na graničnim prijelazima za međunarodni saobraćaj i graničnim prijelazima za pogranični saobraćaj postavlja se jarbol na kojem se viori zastava Bosne i Hercegovine.

(2) Na graničnom prijelazu za cestovni saobraćaj, na graničnom prijelazu za zračni saobraćaj i na graničnom prijelazu za željeznički saobraćaj jarbol se postavlja ispred zgrade na ulaznoj strani.

(3) Na graničnom prijelazu za riječni saobraćaj i na graničnom prijelazu za pomorski saobraćaj jarbol se postavlja na području graničnog prijelaza predviđenog za pristajanje plovila.

(4) Jarbol je visine 7 m, a na graničnim prijelazima gdje pušu jaki vjetrovi jarbol može biti visine 5 m.

(5) Jarbol se izrađuje od metala obojenog bijelom bojom.

## **POGLAVLJE II. POSEBNE NATPISNE TABLE I SIGNALIZACIJA UZ GRANIČNU LINIJU**

### **Član 9.**

#### **(Oznaka upozorenja)**

- (1) Na cestovnim i drugim komunikacijama na kojima je zabranjen prekogranični saobraćaj, u neposrednoj blizini granične linije postavlja se oznaka upozorenja na približavanje državnoj granici.
- (2) Oznaka iz stava 1. ovog člana, postavlja se na prijedlog Granične policije Bosne i Hercegovine.
- (3) Oznaka iz stava 1. ovog člana je u obliku natpisne table veličine 1250 x 1500 mm, bijele je boje sa plavo-žutom ivicom širine 30 mm, od kojih je plava krajnja traka. U gornjem dijelu natpisne table je grb Bosne i Hercegovine visine 250 mm i srazmjerne širine ispod kojeg je natpis "UPOZORENJE", a ispod natpis "DRŽAVNA GRANICA" ispisano slovima veličine 70 mm crne boje. Ispod ovih natpisa su dva saobraćajna znaka izričitih naredbi veličine Ø 400 mm (zabrana kretanja pješaka i zabrana saobraćaja u oba smjera) (Prilog 6. ovog Pravilnika).

### **Član 10.**

#### **(Dopunska tabla)**

- (1) Ispod oznake iz člana 9. ovog Pravilnika može se postaviti dopunska tabla koja obavještava o mogućnosti prelaska državne granice na najbližem graničnom prijelazu.
- (2) Dopunska tabla iz stava 1. ovog člana je bijele boje veličine 1250 x 760 mm sa plavo-žutom ivicom širine 30 mm, od kojih je plava krajnja traka. U gornjem dijelu table je crnim slovima veličine 70 mm ispisan natpis: "NAJBLIŽI GRANIČNI PRIJELAZ", a ispod je naziv graničnog prijelaza, uz koji se može dodati strelica koja je usmjerena u pravcu gdje se nalazi taj granični prijelaz (Prilog 7. Ovog Pravilnika).
- (3) Dopunska tabla iz stava 2. ovog člana postavlja se na prijedlog Granične policije Bosne i Hercegovine.

### **Član 11.**

#### **(Označavanje zaštitnog područja)**

- (1) Na ulasku u zaštitno područje uz graničnu liniju, na cestovnim i drugim komunikacijama mogu se postaviti posebne natpisne table sa upozorenjem na zaštićeno područje, veličine 1250 x 1150 mm, bijele boje sa plavožutom ivicom širine 30 mm, od kojih je plava krajnja traka. U gornjem dijelu natpisne table je grb Bosne i Hercegovine veličine 250 mm, ispod kojeg je crnim slovima veličine 70 mm ispisan natpis "ZAŠTITNO PODRUČJE" i "KRETANJE OGRANIČENO" (Prilog 8. ovog Pravilnika).
- (2) Natpisna tabla iz stava (1) ovog člana postavlja se na prijedlog Granične policije Bosne i Hercegovine.

## **POGLAVLJE III. ZAJEDNIČKE ODREDBE**

### **Član 12.**

#### **(Natpisi na oznakama)**

- (1) Natpisi na oznakama iz ovog Pravilnika ispisuju se latiničnim i ćiriličnim pismom, na službenim jezicima u upotrebi u Bosni i Hercegovini.
- (2) Natpisi na oznakama upozorenja iz čl. 9., 10. i 11. Ovog Pravilnika ispisuju se i na engleskom jeziku.
- (3) Tip slova je u skladu sa važećim standardima u Bosni i Hercegovini.

### **Član 13.**

#### **(Table)**

- (1) Sve table oznaka su od aluminijskog lima.
- (2) Površina oznaka izrađuje se od materijala reflektujućih svojstava najmanje I klase.
- (3) Boja poleđine podloge table oznaka je sive boje, bez sjaja, kako bi se spriječilo odvratanje pažnje ili zasljepljivanje vozača.
- (4) Plava i žuta boja oznaka na tablama su u skladu sa odredbama Zakona o grbu Bosne i Hercegovine ("Službeni glasnik BiH", broj 19/01).

#### **Član 14.**

##### **(Postavljanje drugih oznaka i natpisa)**

Na graničnom prijelazu, njegovom području, te u blizini granične linije nije dozvoljeno postavljanje bilo kakvih drugih oznaka i natpisa, koji nisu propisani ovim pravilnikom, osim saobraćajnih znakova i signalizacije propisanih Pravilnikom o saobraćajnim znakovima i signalizaciji na cestama, načinu obilježavanja radova i prepreka na cesti i znakovima koje učesnicima u saobraćaju daju ovlaštena lica.

#### **Član 15.**

##### **(Standardi)**

Oznake i druga saobraćajna signalizacija propisana ovim Pravilnikom moraju zadovoljiti tehničke uvjete propisane važećim standardima.

#### **Član 16.**

##### **(Saobraćajni projekt)**

(1) Oznake i druga saobraćajna signalizacija, propisana ovim Pravilnikom, postavlja se na osnovu Saobraćajnog projekta, koji odobrava Ministarstvo komunikacija i prometa Bosne i Hercegovine.

(2) Za izradu Saobraćajnog projekta iz stava (1) ovog člana, za oznake i drugu saobraćajnu signalizaciju na cestama zaduženo je Ministarstvo komunikacija i prometa BiH, a za oznake i drugu saobraćajnu signalizaciju na željeznici, zračnim, morskim i riječnim lukama zadužen je operater koji upravlja infrastrukturom.

#### **POGLAVLJE IV. PRIJELAZNE I ZAVRŠNE ODREDBE**

#### **Član 17.**

##### **(Rok)**

U roku od 20 mjeseci od dana stupanja na snagu ovog Pravilnika, granični prijelazi i njihova područja bit će označeni oznakama i drugom signalizacijom na način propisan ovim Pravilnikom.

#### **Član 18.**

##### **(Stavljanje van snage)**

Stupanjem na snagu ovog Pravilnika prestaje važiti Pravilnik o obliku, sadržaju i načinu postavljanja propisanih znakova i signalizacije na graničnim prijelazima i uz graničnu liniju ("Službeni glasnik BiH", broj 10/06) i Pravilnik o obliku i sadržaju oznaka i druge saobraćajne signalizacije kojim se označava granični prijelaz i njegovo područje, kao i načinu postavljanja tih oznaka i signalizacije ("Službeni glasnik BiH", broj 17/10).

#### **Član 19.**

##### **(Stupanje na snagu)**

Ovaj pravilnik stupa na snagu osmog dana od dana objavljivanja u "Službenom glasniku BiH".

Broj 01-04-02-2-6161/12  
11. decembra 2012. godine  
Sarajevo

Ministar  
**Damir Hadžić**, s. r.

Prilog 1

















